



DASAR KESELAMATAN NEGARA



ISI KANDUNGAN

1.	Pengenalan	1
2.	Penyataan Dasar Keselamatan Negara	1
3.	Malaysia dalam Konteks Geostrategik	2
4.	Persekitaran Keselamatan Negara	3
5.	Nilai-nilai Teras (Core Values) Malaysia	6
	5.1.1 Nilai Teras 1: Kedaulatan dan Keutuhan Wilayah	6
	5.1.2 Nilai Teras 2: Kestabilan Sosio-Politik	6
	5.1.3 Nilai Teras 3: Kesepaduan Nasional	6
	5.1.4 Nilai Teras 4: Tadbir Urus Yang Baik	6
	5.1.5 Nilai Teras 5: Keutuhan Ekonomi	7
	5.1.6 Nilai Teras 6: Keadilan Sosial	7
	5.1.7 Nilai Teras 7: Pembangunan Mampan	7
	5.1.8 Nilai Teras 8: Keselamatan Rakyat	8
	5.1.9 Nilai Teras 9: Pengiktirafan Antarabangsa	8
6.	Strategi-Strategi Utama	8
7.	Penutup	11

1. PENGENALAN

- 1.1 Malaysia merupakan sebuah negara berbilang kaum yang mengamalkan sistem pentadbiran berasaskan demokrasi berparlimen dan Raja Berperlembagaan serta berteraskan kesepaduan rakyat, wilayah, Kerajaan, kedaulatan dan pengiktirafan antarabangsa.
- 1.2 Kerajaan bertanggungjawab untuk memastikan kedaulatan dan keselamatan negara sentiasa dilindungi dan terus dipelihara. Keselamatan negara Malaysia merujuk kepada suatu situasi bebas daripada sebarang ancaman terhadap nilai-nilai teras negara sama ada ianya ancaman dari dalam atau luar negara. Ancaman keselamatan negara sejak tahun 1957 seperti ancaman Parti Komunis Malaya, pencerobohan pengganas Tentera Kesultanan Sulu di Sabah pada 2013, usaha-usaha untuk menjatuhkan Kerajaan diluar dari proses demokrasi, ancaman militan dan pengganas serta ancaman global yang pelbagai bentuk memerlukan penggubalan suatu Dasar Keselamatan Negara yang komprehensif.
- 1.3 Dasar Keselamatan Negara atau DKN diperkenalkan sebagai dokumen utama dalam menghadapi pelbagai ancaman keselamatan yang semakin dinamik dan kompleks. Melalui DKN ini, pelaksanaan Strategi-Strategi Utama akan dapat memastikan Nilai-Nilai Teras Negara (*National Core Values*) dipertahankan seterusnya menjadikan Malaysia bebas dari segala bentuk ancaman, bukan sahaja yang bersifat fizikal, malah juga ancaman bukan fizikal yang mempengaruhi dan merosakkan pemikiran rakyat.
- 1.4 Sesungguhnya, DKN yang akan menjadi panduan dan rujukan utama Kementerian-Kementerian dan Agensi di peringkat Persekutuan serta negeri merupakan bukti bahawa Kerajaan sentiasa komited memastikan keselamatan negara terus terjamin dan terpelihara. Lantaran itu, kerjasama rakyat amat diperlukan dalam memberikan sokongan, berganding bahu dan bekerjasama bagi menjamin kelangsungan (*survival*) Malaysia sebagai sebuah negara yang merdeka, selamat dan berdaulat berlandaskan prinsip Demokrasi Berparlimen dan Raja Berperlembagaan. Ianya bukan sahaja untuk masyarakat pada masa kini, tetapi yang lebih utama demi kesejahteraan dan keamanan generasi akan datang.

2. PENYATAAN DASAR KESELAMATAN NEGARA

- 2.1 DKN adalah satu dasar payung atau teras mengenai keselamatan negara yang komprehensif bertujuan untuk mengekal, melindungi dan mempertahankan nilai-nilai teras negara dalam memastikan kelangsungan Malaysia sebagai sebuah negara yang merdeka, aman, selamat dan berdaulat.

3. MALAYSIA DALAM KONTEKS GEOSTRATEGIK

- 3.1 Malaysia berada di kedudukan strategik di tengah-tengah rantau Asia Tenggara. Malaysia juga terletak di laluan perkapalan utama dunia iaitu Selat Melaka dan Laut China Selatan yang sering menjadi perhatian kuasa-kuasa besar yang berkepentingan. Kedudukan geografi ini mempengaruhi hubungan dua hala dan pelbagai hala Malaysia dengan negara-negara serantau dan antarabangsa dalam aspek kepentingan politik, sosio-ekonomi, keselamatan, budaya, pertahanan dan sebagainya. Selain itu, keselamatan Malaysia juga banyak dipengaruhi oleh geopolitik serantau dan antarabangsa seperti berikut:

Serantau

- 3.1.1 ASEAN adalah tumpuan utama dalam dasar luar Malaysia. Sebagai salah sebuah negara pengasas ASEAN, Malaysia menyokong penuh dan berpegang teguh kepada prinsip-prinsip asas yang terkandung dalam Piagam ASEAN seperti menentang penggunaan kekerasan, tidak campurtangan dalam politik dalaman negara anggota serta mengutamakan penyelesaian pertikaian secara aman sebagai kunci utama dalam mengekalkan keamanan, kestabilan dan kemakmuran di rantau ini. Komitmen ini bertujuan untuk memelihara kepentingan strategik negara.
- 3.1.2 Malaysia turut menjalin kerjasama strategik di peringkat serantau melalui penglibatan aktif dalam organisasi keselamatan dan pertahanan serantau seperti ASEAN Regional Forum (ARF), *ASEAN Defence Ministerial Meeting* (ADMM), *Five Powers Defence Arrangement* (FPDA) dan sebagainya bagi melindungi kepentingan negara.

Antarabangsa

- 3.1.3 Negara-negara seperti Amerika Syarikat, China, Perancis, Rusia, United Kingdom, Jepun, India, Australia, negara-negara Kesatuan Eropah dan beberapa negara lain merupakan negara-negara yang mempunyai kepentingan strategik kepada Malaysia dan rantau ini. Negara-negara ini penting kerana mempunyai keupayaan untuk mencorakkan persekitaran politik dan ekonomi antarabangsa dengan cara ketenteraan selain kekuatan ekonomi dan teknologi bagi meluaskan pengaruh politik serta memenuhi kepentingan mereka.
- 3.1.4 Komitmen negara dalam pertubuhan-pertubuhan antarabangsa seperti Pertubuhan Bangsa-Bangsa Bersatu (PBB), Pertubuhan Kerjasama Islam (OIC), Pergerakan Negara-Negara Berkecuali (NAM), Komanwel, G-15, G-77 serta lain-lain pertubuhan antarabangsa dalam menangani isu-isu strategik global telah meletakkan Malaysia selaku negara sahabat yang boleh dipercayai dan disegani di peringkat antarabangsa. Melalui penglibatan aktif Malaysia dalam pertubuhan-pertubuhan antarabangsa, dasar dan kepentingan negara dalam isu keselamatan dapat diketengah dan dipertahankan. Selain itu, penyertaan negara dalam operasi pengaman dan rehabilitasi pasca konflik di pelbagai negara yang

terjejas akibat kancah perang, konflik dalaman dan bencana juga telah mengukuhkan persepsi terhadap peranan dan keprihatinan Malaysia sebagai pemain global. Pelantikan Malaysia sebagai ahli tidak tetap Majlis Keselamatan PBB, dan sebagai pengerusi kumpulan seperti OIC, NAM dan G-77 antara lainnya memperlihatkan pengiktirafan oleh masyarakat antarabangsa terhadap peranan yang dimainkan oleh Malaysia di peringkat global.

4. PERSEKITARAN KESELAMATAN NEGARA

4.1. Malaysia telah melalui evolusi yang mencabar dalam memelihara kedaulatan, keselamatan negara dan ketenteraman awam. Landskap keselamatan kini semakin kompleks melibatkan ancaman-ancaman dari pelaku negara (*state actor*) dan pelaku bukan negara (*non-state actor*) yang berpotensi memberikan impak besar ke atas keselamatan serta kedaulatan negara. Pengalaman lalu yang pernah dihadapi negara dari segi keselamatan termasuklah kolonialisme kuasa asing, keganasan komunis, Konfrontasi Indonesia, pemisahan wilayah, konflik perkauman 13 Mei 1969, ekstremisme (kaum, ideologi, agama dan politik), krisis ekonomi, bencana alam dan pencerobohan wilayah. Usaha memastikan keselamatan negara dan kelangsungan Malaysia sebagai sebuah negara berdaulat perlu mengambilkira aspek ancaman dalam negara dan suasana geopolitik di peringkat serantau dan antarabangsa seperti berikut:

4.1.1 Kerapuhan Perpaduan Nasional

Isu-isu yang menyentuh sensitiviti kaum, etnik, agama, kepercayaan dan kebudayaan yang tersebar dengan meluas tanpa sekatan di media sosial masih lagi menjadi punca pergeseran antara kaum di Malaysia yang menjejaskan hasrat negara untuk mewujudkan masyarakat yang bersatu padu dan progresif.

4.1.2 Cabaran Terhadap Sistem Demokrasi Negara

Wujud usaha dan gerakan untuk menjatuhkan Kerajaan melalui cara di luar proses demokrasi yang melanggar undang-undang negara. Tindakan ini akan melemahkan institusi negara seterusnya mengancam ketenteraman awam dan keselamatan negara.

4.1.3 Pendatang Asing Tanpa Izin (PATI) dan 'Pelarian'¹

Keamanan, kemakmuran dan pertumbuhan ekonomi yang pesat turut menjadi faktor penarik kepada kemasukan Pendatang Tanpa Izin (PATI) dan 'pelarian'. Kehadiran PATI dan 'pelarian' ini selain dari memberi implikasi sosial, ekonomi, jenayah, politik dan hubungan diplomasi, ia juga berupaya untuk mengancam ketenteraman dan keselamatan negara.

¹ Penggunaan terminologi ini dalam dokumen ini tidak bermakna Malaysia menerima konsep pelarian seperti yang ditakrifkan dalam mana-mana dokumen mengenai pelarian termasuklah *Convention Relating to the Status of Refugees 1951* dan *Protocol Relating to the Status of Refugees 1967*.

4.1.4 **Pertikaian Tuntutan Wilayah**

Malaysia masih berdepan isu tuntutan bertindih dan pertikaian wilayah darat, maritim dan udara dengan negara-negara jiran serta kuasa-kuasa besar. Pertikaian ini berpotensi menjejaskan hubungan dua hala antara Malaysia dengan negara-negara jiran. Di peringkat serantau, tuntutan bertindih boleh mencetuskan risiko konflik bersenjata sehingga mendatangkan kesan kolateral serantau dan berpotensi menarik campur tangan pihak luar yang berkepentingan sekiranya tidak ditangani dengan sewajarnya.

4.1.5 **Ekstremisme dan Keganasan**

Isu keganasan antarabangsa terus menjadi ancaman global yang memberikan impak langsung kepada keselamatan Malaysia. Elemen-elemen ekstremisme dan keganasan yang menyusup masuk ke dalam negara serta penglibatan rakyat Malaysia di dalam aktiviti keganasan di dalam dan luar negara, boleh mencetuskan kekacauan dan menggugat keamanan negara.

4.1.6 **Keselamatan Siber**

Penemuan dan perkembangan pesat teknologi maklumat dan komunikasi (ICT) telah meningkatkan kebergantungan kepada teknologi ini yang turut membuka ruang kepada risiko ancaman keselamatan siber. Sifat dimensi ruang siber yang luas tanpa sempadan dengan akses mudah dan mampu dimiliki serta berciri ketanpanamaan telah meningkatkan lagi risiko ancaman-ancaman serangan terhadap infrastruktur maklumat kritikal negara, penyalahgunaan internet, kegiatan perisikan/espionaj siber dan sebagainya. Trend serangan dan insiden keselamatan siber yang berlaku kini semakin meningkat dengan impak yang sukar diramal.

4.1.7 **Kejadian Bencana**

Malaysia terdedah kepada bahaya dan risiko bencana alam seperti banjir, taufan, ribut, penyakit berjangkit, wabak, gempa bumi, tsunami, kemarau/El-Nino, tanah runtuh, jerebu, kesan perubahan iklim ke atas kejadian bencana seperti kenaikan paras laut, suhu udara dan darat dan bencana buatan manusia. Kejadian bencana bersifat kompleks dan bermagnitud besar yang berlaku samada di dalam atau di luar negara, boleh menjejaskan kehidupan rakyat dan merencatkan perjalanan pentadbiran negara.

4.1.8 **Kejadian Krisis**

Malaysia juga terdedah kepada pelbagai krisis sama ada di dalam ataupun di luar negara termasuklah ekonomi, sosial dan peperangan. Krisis ini berupaya memberi impak secara langsung kepada rakyat sekaligus menjejaskan keselamatan negara. Krisis yang berlaku di luar negara juga boleh menyebabkan berlakunya migrasi tidak terkawal ke negara lain termasuklah Malaysia.

4.1.9 **Jenayah Rentas Sempadan**

Kedudukan Malaysia yang mempunyai sempadan darat dengan negara jiran dan terletak di laluan strategik maritim iaitu Selat Melaka dan Laut China Selatan menjadikan Malaysia terdedah kepada ancaman bersifat rentas sempadan seperti penyeludupan (manusia, hidupan liar, hasil hutan, dadah, barangan dan senjata), pemerdagangan orang, pelanunan, jenayah terancang, jenayah siber, pengubahan wang haram, jenayah ekonomi dan rompak di laut dan sebagainya.

4.1.10 **Pandemik dan Wabak Penyakit**

Mobiliti penduduk dunia dan dalam negara yang lebih mudah dan pantas telah mendedahkan rakyat Malaysia terhadap ancaman kesihatan. Penularan wabak pandemik dan penyakit berjangkit sama ada berpunca dari dalam dan luar negara boleh menjejaskan sosio-ekonomi negara. Penyakit tidak berjangkit pula seperti darah tinggi, kencing manis sehingga sakit buah pinggang, sakit jantung dan lain-lain lagi jika tidak diberi perhatian sewajarnya boleh menyebabkan negara muflis.

4.1.11 **Keselamatan Tenaga**

Dunia hari ini berhadapan dengan ketidaktentuan keselamatan sumber tenaga. Kebergantungan kepada sumber tenaga tradisional yang berasaskan fosil dijangka akan meningkat sehingga sumber tenaga alternatif yang lebih bersih dan murah digunakan secara meluas. Namun, buat masa ini, perebutan terhadap sumber tenaga tradisional berasaskan fosil boleh berlaku dan mencetuskan konflik serantau dan antarabangsa.

4.1.12 **Jaminan Bekalan Makanan**

Kelangsungan negara juga bergantung kepada keselamatan sumber makanan. Pertambahan penduduk dunia meningkatkan lagi permintaan kepada sumber makanan. Kegagalan menguruskan sumber makanan, akan mewujudkan persaingan terhadap sumber makanan dan mewujudkan kebergantungan yang tinggi kepada sumber luar.

4.1.13 **Kecambahan Nuklear dan Program Pembangunan Senjata**

Negara juga terdedah kepada ancaman nuklear termasuklah penggunaan nuklear untuk tujuan peperangan. Kelonggaran elemen kawalan dan tekanan ke atas program nuklear dan senjata pemusnah di kalangan negara pelaku (*state actors*) khasnya negara-negara kuasa besar serta risiko kemalangan di loji nuklear yang boleh mendatangkan mudarat kepada kesihatan penduduk serantau, kehidupan marin dan alam sekitar, di samping potensi kewujudan senjata pemusnah besar-besaran yang berupaya menggugat keamanan serantau.

5. NILAI-NILAI TERAS (*CORE VALUES*) MALAYSIA

5.1 Nilai-nilai teras negara merupakan nilai yang perlu dipelihara, dikekalkan dan diperkukuhkan bagi menjamin kelangsungan Malaysia sebagai sebuah negara merdeka, aman dan berdaulat. Nilai-nilai teras yang dimaksudkan adalah seperti berikut:

5.1.1 Nilai Teras 1: Kedaulatan dan Keutuhan Wilayah

Kedaulatan negara dan keutuhan wilayah merupakan teras kepada kestabilan dan keselamatan sesebuah negara. Kewujudan Malaysia sepertimana termaktub di dalam Perlembagaan Persekutuan yang merangkumi negeri-negeri Johor, Kedah, Kelantan, Melaka, Negeri Sembilan, Pahang, Pulau Pinang, Perak, Perlis, Sabah, Sarawak, Selangor, Terengganu, dan Wilayah-Wilayah Persekutuan hendaklah dipelihara dan dikekalkan. Kedaulatan Malaysia juga merangkumi perairan laut wilayah dan hak-hak berdaulat (*sovereign rights*) ke atas zon maritim Malaysia selaras dengan undang-undang antarabangsa yang berkaitan. Malaysia perlu melindungi dan mempertahankan kedaulatan dan keutuhan wilayah dari ancaman dalam dan luar negara.

5.1.2 Nilai Teras 2: Kestabilan Sosio-Politik

Kestabilan sosio-politik adalah penting dalam mewujudkan suasana aman dan harmoni di kalangan rakyat Malaysia. Kerajaan bertanggungjawab untuk menjunjung demokrasi berparlimen, Raja Berperlembagaan, kedaulatan undang-undang, keluhuran Perlembagaan, menghormati dan menjamin hak-hak asasi rakyat berdasarkan Perlembagaan Persekutuan. Pada masa yang sama, rakyat juga bertanggungjawab untuk menyokong dasar-dasar yang dilaksanakan oleh Kerajaan bagi memastikan keamanan dan kestabilan negara. Prinsip-prinsip tersebut perlu dihormati dan dipatuhi oleh seluruh rakyat Malaysia tanpa mengira fahaman politik, agama, etnik, asal usul dan status sosial.

5.1.3 Nilai Teras 3: Kesepaduan Nasional

Malaysia merupakan sebuah negara yang mempunyai pelbagai etnik, budaya dan agama. Kesepaduan nasional merupakan teras kekuatan dan keselamatan negara. Kesepaduan negara akan terhasil melalui ikatan perpaduan di kalangan seluruh rakyat Malaysia. Dalam hubungan ini, formula perpaduan bagi negara yang mempunyai masyarakat majmuk seperti Malaysia terletak kepada kesatuan rakyat pelbagai kaum untuk hidup saling faham memahami, bertoleransi, menerima kepelbagaian antara satu sama lain dan memahami kontrak sosial yang menjadi tunjang kesepaduan rakyat Malaysia dan menghormati hak-hak asasi manusia berteraskan kepada Perlembagaan Persekutuan.

5.1.4 Nilai Teras 4: Tadbir Urus Yang Baik

Tadbir urus yang baik juga merupakan teras penting keselamatan negara. Ia bukan sahaja melibatkan sektor kerajaan tetapi juga

swasta. Ini kerana tadbir urus yang baik akan membolehkan sesebuah negara tersebut dapat melaksanakan dasar-dasar yang digubal, mengurus sumber-sumber negara dengan cekap dan berkesan, mendapat pengiktirafan antarabangsa dan memenuhi ekspektasi rakyat. Tadbir urus yang baik antara lain meliputi integriti tinggi, tiada rasuah, jujur, amanah, adil, saksama, telus, bertanggungjawab dan sebagainya.

5.1.5 Nilai Teras 5: Keutuhan Ekonomi

Keutuhan ekonomi bermaksud negara mempunyai ekonomi yang mampan serta berdaya tahan terhadap ancaman-ancaman berkaitan ekonomi dari dalam dan luar negara. Ekonomi yang tidak kukuh akan menjejaskan kestabilan negara akibat kemiskinan, pengangguran dan rasa tidak puas hati di kalangan masyarakat. Keutuhan ekonomi juga melibatkan penyertaan, pemilikan, penglibatan dan penguasaan rakyat Malaysia dalam memastikan kelangsungan ekonomi negara ini. Selain itu, pengukuhan ekonomi dan penambahbaikan keadaan sosial adalah faktor penyumbang kepada pengukuhan tahap keselamatan negara dan kepincangannya berpotensi mengancam keselamatan negara.

5.1.6 Nilai Teras 6: Keadilan Sosial

Keadilan sosial adalah teras penting dalam memastikan keselamatan negara. Perlindungan hak asasi manusia bagi setiap rakyat Malaysia adalah selaras dengan peruntukan Perlembagaan Persekutuan dan undang-undang antarabangsa yang dianggotai (dengan reservasi) oleh Malaysia. Semua rakyat Malaysia termasuk dari golongan minoriti hendaklah sentiasa dilindungi dan tiada mana-mana pihak akan dipinggirkan. Nilai teras ini mestilah dipertahankan selaras dengan Perlembagaan Persekutuan dengan mengambilkira taraf kemajuan sosio-ekonomi kaum-kaum yang berada pada tahap yang berbeza. Oleh itu, dasar-dasar kerajaan dan peruntukan-peruntukan Perlembagaan Persekutuan yang memberikan pembelaan kepada golongan yang memerlukannya akan terus dilaksanakan. Walau bagaimanapun, prinsip keadilan sosial ini bukanlah landasan bagi mana-mana pihak untuk membuat tuntutan yang keterlaluan sehingga mengancam keselamatan dan kedaulatan negara.

5.1.7 Nilai Teras 7: Pembangunan Mampan

Pembangunan mampan adalah pembangunan yang memenuhi keperluan semasa serta masa hadapan bagi mencapai keseimbangan pembangunan ekonomi, sosial, demografi dan alam sekitar. Aspek keselamatan perlu diberi keutamaan dalam setiap perancangan pembangunan bagi memastikan kelangsungan sumber-sumber negara, kesejahteraan rakyat dan keperluan generasi akan datang terpelihara. Pembangunan yang tidak seimbang berpotensi menyebabkan ketidakseimbangan ekologi dan demografi negara.

5.1.8 Teras 8: Keselamatan Rakyat

Perkembangan idea dan persekitaran keselamatan dunia menyaksikan perubahan daripada pendekatan keselamatan berpaksikan negara (*state centric security*) kepada pendekatan keselamatan berpaksikan insan (*people centric security*). Kesejahteraan, kebajikan dan hak-hak rakyat Malaysia di bawah Perlembagaan Persekutuan perlu dilindungi dan dijamin oleh Kerajaan. Pada masa yang sama, hak-hak negara juga perlu didukung dan dipertahankan oleh rakyat dengan penuh semangat patriotik dan rasa tanggungjawab terhadap keselamatan dan kelangsungan negara.

5.1.9 Teras 9: Pengiktirafan Antarabangsa

Sikap pragmatik, berprinsip dan berkecuali Malaysia selama ini, telah menjamin pengiktirafan dan kerjasama ekonomi, politik dan keselamatan yang berterusan dengan kuasa-kuasa besar serantau dan antarabangsa. Strategi diplomasi dua hala dan pelbagai hala yang dirangka secara menyeluruh disokong oleh pelaksanaan dasar hubungan luar yang konsisten semenjak kemerdekaan negara telah mewujudkan imej yang positif di peringkat antarabangsa sekaligus menjamin pengiktirafan berterusan terhadap kedaulatan dan kepentingan negara.

6. STRATEGI-STRATEGI UTAMA

Bagi memelihara dan mempertahankan nilai-nilai teras negara, beberapa strategi utama perlu dilaksanakan. Strategi-strategi yang dimaksudkan adalah seperti berikut:

6.1 Strategi 1: Mendukung Perlembagaan Persekutuan

Meningkatkan penghayatan, menghormati, dan mendukung prinsip-prinsip yang terkandung dalam Perlembagaan Persekutuan demi kestabilan dan kesejahteraan negara.

6.2 Strategi 2: Memelihara Kedaulatan Wilayah

Meningkatkan kawalan di wilayah negara termasuk kawasan-kawasan strategik di darat, maritim, dan udara bagi melindungi, mempertahankan serta memperkukuh kedaulatan negara daripada sebarang ancaman.

6.3 Strategi 3: Memperkukuh Keutuhan Wilayah

Mempertahankan keutuhan wilayah dan kawasan sempadan Malaysia yang masih terdapat tuntutan bertindih sama ada di laut, daratan mahupun udara selaras dengan peruntukan-peruntukan Perlembagaan Persekutuan melalui perundangan, pemantauan dan rondaan di kawasan tersebut bagi memastikan keutuhan wilayah negara sentiasa terpelihara dan mengelakkan kehilangan kawasan tersebut di masa akan datang sekiranya perkara ini dibawa ke pengadilan antarabangsa.

6.4 **Strategi 4: Memperkasa Keupayaan dan Kesiagaan Pertahanan dan Keselamatan**

Memperkasakan pertahanan dan keselamatan negara dari segi keupayaan dan kesiagaan. Pemerkasaan ini adalah untuk mengimbangi keupayaan pertahanan dan keselamatan negara serantau selain berperanan sebagai elemen cegah-rintang (*deterrence*). Industri pertahanan dan program penyelidikan pertahanan dan keselamatan juga perlu ditingkatkan bagi mengurangkan kebergantungan kepada teknologi luar.

6.5 **Strategi 5: Memperkukuh Jaringan Perisikan**

Memperluaskan bidang perisikan dan memperkukuhkan jaringan komuniti perisikan bagi perkongsian dan penyaluran maklumat strategik yang tepat dengan pantas. Maklumat perisikan juga perlu diintegrasikan dan diselaraskan bagi membolehkan perancangan dan tindakbalas berkesan diambil dalam mempertahankan kepentingan negara.

6.6 **Strategi 6: Mengukuhkan Sistem dan Institusi Negara**

Mengukuhkan penerimaan rakyat terhadap sistem Demokrasi Berparlimen, Raja berpelembagaan dan institusi negara berteraskan kepada Perlembagaan Persekutuan dan Prinsip Rukun Negara yang menjadi tunjang kestabilan sosio-politik negara.

6.7 **Strategi 7: Mengukuhkan Perpaduan Nasional**

Mengukuhkan perpaduan nasional berteraskan kepada Perlembagaan Persekutuan bagi membentuk sebuah bangsa Malaysia yang mempunyai identiti yang sama walaupun mengamalkan kepelbagaian budaya.

6.8 **Strategi 8: Merapatkan Jurang Sosio-Ekonomi**

Memperbanyakkan peluang pekerjaan kepada penduduk tempatan, menambahbaik ketidakseimbangan pendapatan antara kaum, mentransformasi luar bandar bagi meningkatkan kesejahteraan masyarakat, memperkasa komuniti untuk membina masyarakat yang produktif dan mampu menjana pendapatan sendiri serta memperkukuhkan infrastruktur luar bandar bagi menyokong pertumbuhan ekonomi penduduk.

6.9 **Strategi 9: Perpaduan Melalui Pendidikan**

Menyemai dan memupuk semangat dan kepentingan perpaduan di kalangan rakyat pelbagai kaum bermula dengan sistem pendidikan berteraskan kepada bahasa pengantar kebangsaan iaitu Bahasa Melayu.

6.10 **Strategi 10: Memupuk Semangat Jatidiri**

Memupuk perasaan cinta, bangga dan rasa tanggungjawab terhadap negara dalam kalangan rakyat melalui pendekatan Pertahanan Menyeluruh (HANRUH) sebelum, semasa dan selepas sesuatu musibah berlaku.

6.11 **Strategi 11: Membina Ketahanan Ekonomi**

Memperkukuhkan asas ekonomi negara untuk berhadapan persaingan ekonomi global selain mengekalkan keabsahan Kerajaan dalam pengurusan ekonomi negara tanpa dipengaruhi kuasa asing. Kepentingan ekonomi di luar negara perlu dilindungi bagi menyokong pertumbuhan ekonomi domestik.

6.12 **Strategi 12: Membudayakan Nilai Integriti**

Mempertingkatkan usaha bagi memerangi gejala rasuah, penyelewengan dan salah guna kuasa di semua peringkat dan sektor (awam atau swasta) melalui peruntukan undang-undang, peraturan, dan dasar.

6.13 **Strategi 13: Melaksanakan Pembangunan Mampan**

Melaksanakan dasar-dasar pembangunan dengan mengambilkira keperluan sedia ada dan masa hadapan merangkumi aspek-aspek keselamatan, ekologi dan demografi. Kesedaran masyarakat serta semua pihak yang berkepentingan mengenai kaitan pembangunan mampan dengan keselamatan negara perlu dipertingkatkan.

6.14 **Strategi 14: Menguruskan Sumber-Sumber Negara Secara Cekap**

Memperkemas mekanisme pengurusan sumber-sumber negara supaya sumber-sumber negara digunapakai secara optimum dan pada masa yang sama menggalakkan pencarian kepada sumber-sumber alternatif bagi mengelakkan kebergantungan keterlaluan kepada sumber luar seterusnya menjamin kelangsungan negara.

6.15 **Strategi 15: Menjamin Hak Asasi Rakyat Berteraskan Perlembagaan Persekutuan**

Melaksanakan dasar-dasar berkaitan hak asasi rakyat yang konsisten dengan peruntukan Perlembagaan Persekutuan dan perundangan antarabangsa yang dianggotai oleh Malaysia.

6.16 **Strategi 16: Meningkatkan Kesejahteraan Rakyat**

Meningkatkan kualiti hidup dan kesejahteraan rakyat dengan menyediakan penyampaian perkhidmatan yang menyeluruh dan persekitaran yang selamat dan sihat. Pada masa yang sama, rakyat perlu bertanggungjawab dan berperanan dalam memastikan kesejahteraan dan keselamatan negara sentiasa terpelihara.

6.17 **Strategi 17: Mengukuhkan Keselamatan dan Ketahanan Siber**

Memastikan persekitaran siber yang selamat melalui pengurusan risiko yang komprehensif merangkumi pengukuhan keselamatan dan ketahanan terutama yang melibatkan infrastruktur maklumat kritikal negara.

6.18 **Strategi 18: Memperkemas Pengurusan dan Kawal Selia Migran**

Membendung kemasukan Pendatang Asing Tanpa izin (PATI), 'pelarian' dan pemohon suaka politik melalui pengukuhan mekanisme pengurusan migran. Ini termasuk pengukuhan mekanisme pengurusan dan kawal selia tenaga kerja asing.

6.19 **Strategi 19: Mengukuhkan Kerjasama Serantau**

Memastikan elemen kerjasama serantau dalam memelihara serta mempertahankan nilai-nilai teras negara seperti kedaulatan dan keutuhan wilayah, dan kestabilan sosiopolitik. Di peringkat serantau, Malaysia aktif menggunakan platform ASEAN untuk menguruskan pelbagai konflik serantau.

7. **PENUTUP**

Walau apapun bentuk perubahan yang berlaku kepada landskap keselamatan domestik, serantau dan antarabangsa pada masa hadapan, Kerajaan hendaklah memastikan keselamatan dan kelangsungan negara terus terjamin melalui pelaksanaan dasar dan strategi-strategi yang terkandung dalam DKN. DKN ini menggariskan halatuju keselamatan negara berpaksikan persekitaran dalam dan luar negara. Dalam mencapai maksud tersebut, asas negara yang termaktub dalam Perlembagaan Persekutuan perlu dipertahankan di samping menyesuaikan negara dengan nilai-nilai sejagat (hak asasi manusia). Nilai-nilai teras DKN digubal secara holistik dengan mengambilkira komponen-komponen negara iaitu wilayah, Kerajaan, rakyat, kedaulatan dan pengiktirafan antarabangsa. Pelaksanaan DKN akan dipantau bagi memastikan keberkesanan strategi-strategi yang dirangka. Kejayaan DKN ini bergantung kepada komitmen, sokongan, dan kerjasama semua Kementerian, Jabatan/Agensi di peringkat Persekutuan dan negeri, swasta, Badan Bukan Kerajaan dan rakyat. Justeru, DKN ini perlu dijadikan rujukan utama dan panduan yang mesti dipatuhi dalam menggubal, menyelaras dan melaksana dasar-dasar negara yang mempunyai kaitan secara langsung atau tidak langsung terhadap keselamatan negara.